

張文襄公奏議

張文襄公全集卷三十三

奏議三十三

派員專辦沿邊緝捕事宜摺

光緒十八年十二月初七日

竊查湖北省北路沿邊各屬如襄陽光化隨州棗陽應山等州縣與河南鄧州新野唐縣桐柏信陽連界素爲刀痞會匪出沒之區號稱難治本年六月間六月間襄陽穀城光化一帶因時疫流行匪徒乘機嘯聚造謠煽惑牽涉教堂放火燒搶沿襄河上下數百里間居民大爲驚擾紛紛遷徙入城上砦幾釀變端隨州各村亦有匪徒徧插小紅旗之事當經臣等派撥勇營馳往彈壓

查拏獲犯懲辦均經奏明在案嗣後又經續獲要匪數名現正分別審辦惟匪黨多已逃逸出沒楚豫邊界劫掠爲患查楚豫沿邊一帶近年以來哥老會匪頗多又向有燈花教匪卽白蓮教之類行蹤詭祕飄忽靡定與刀匪會匪互相勾煽根株糾結蔓延日廣往往越境行劫此拏彼竄恃衆窩藏動輒拒捕本年入冬以來襄陽盜案頗多隨州復有查獲豫匪多人執持洋槍刀械入境圖劫之事伏莽潛滋實爲邊境隱憂若不及早設法籌辦難保不養成當日擒匪之患且襄陽屬教堂頗多該匪藉端生事於交涉事體必致動生枝節是以九月

內湖北提臣程文炳安襄鄖荊道朱其煊與河南南陽
鎮南汝光道約期會哨會商聯絡查緝之法臣等督同
臬司陳寶箴詳加籌議各州縣限於職守究有畛域之
分必須遴派幹員專司督捕假以事權輔以兵力多方
偵緝尋蹤購捕始足以清邊境而弭亂階查有本任興
國州知州宋熙曾老成幹練強毅有爲長於詰奸懲暴
熟悉沿邊情形堪以派委總辦北路襄陽光化隨州棗
陽應山五屬緝匪事務擇要於樊城隨州兩處輪流駐
劄仍不時往來巡查邊境相機遏截與豫省文武互相
聯絡協助令其選募緝勇六十名以資驅策邊地平行

追截匪徒馬隊最爲得力並派新經移駐樊城之鳳字馬隊中營營官副將劉恩榮督率所部幫同該員辦理沿邊五屬緝捕事宜兼飭駐劄襄陽一帶緝私之鳳字馬隊前後二營一體巡邏追捕不得株守一隅其沿邊地方營汛及操防練軍均准由宋熙會隨時知照協緝以期應手如在何處拏獲匪徒卽會同該處地方官訊取確供照章稟請委員覆訊就地懲辦並咨會河南撫臣飭知豫省沿邊各屬地方文武兩省如有移緝追捕之事不分畛域一體協力圍拏如能多獲著名會匪盜魁再當奏請優獎以示鼓勵

硃批知道了欽此

豫籌鐵廠成本摺

光緒十九年二月二十五日

竊臣奉旨籌辦煉鐵事宜所有歷年欽遵籌辦情形均經奏陳暨電達總理海軍事務衙門各在案三年以來臣督飭各局廠委員外洋工師分投趕辦自光緒十七年八月奏明開工刻下生鐵大鑪二座暨熱風大爐六座煅鑛大爐兩座統爲煉生鐵廠已於二月內完工其煉貝色麻鋼廠造鋼軌廠造鐵貨廠均定於四月內完工煉西門士鋼廠煉熟鐵廠均定於五月內完工總計六大廠五月內一律完竣其機器廠鑄鐵廠打鐵廠三

所已於上年秋冬間完工其大冶縣運鑛鐵路五十餘里暨大冶石灰窯鐵山鋪漢陽鐵廠水陸各馬頭亦於上年秋冬間先後完工此項工程極爲繁重事理極爲精微臣於開工原奏內曾經聲明據洋匠稱此工若在外洋三年乃成臣極力趕辦本擬兩年造成因外洋機器物料運到補齊諸多遲滯無從趕辦計開工至竣工共兩年零十箇月尙在三年以內至煤爲煉鐵第一要務原議本擬以湖南之煤煉湖北之鐵惟運費較貴終非經久之計且煉鐵之煤必須精選灰須極輕黃須極少土窿所采精粗相雜不能一律所出又多少無定恐

難供用不缺幸於江夏大冶兩縣訪得煉鐵煤苗兩處
分用西法開采計七月內江夏馬鞍山一處大井可以
先成鐵廠造成以後擬一面督催兩處煤井工程一面
采運興國州錳鐵一面先與洋匠籌商演試各種機器
較準火候教練匠徒之法并先用湘煤試煉俟本省出
煤漸多可供廠用卽行接續製煉其從前所需經費前
經奏准除部撥之款及借撥本省之款外其餘卽在槍
礮廠經費內勻撥應用係指造廠經費而言至開煉經
費亟須另行豫籌此乃出貨成本與造廠經費兩不相
涉前年開工原奏會將常年經費只須第一年先行籌

墊若干聲明在案譬諸農田既有買田開墾之費又須有常年牛種人工之本始能收穫譬諸鹽務既有築場作竈之費又須有常年煎煉運售之本始能行銷只須籌此一次以後即可周轉並非年年需款鄂廠鐵質甚佳係用西法製煉除鋼軌外其餘鋼鐵各料並可向各省行銷惟此時度支極絀臣所深知斷不敢請撥部款上煩宸慮然此乃中國自強要政臣既奉旨飭辦亦斷不敢因經費困細致沮成功反覆籌思謹就湖北物力之所能辦到者籌一節省騰挪之法查兩爐並開成本約須百萬又須籌還鄂省借墊之款現擬先開一爐

從容擴充以節經費然亦必須五六十萬緣煉生鐵之法一爐能煉鐵若干需煤若干均須裝滿配足晝夜不可間斷既不能少煉以省料亦不能停煉以省工其工作極精細亦極危險稍有舛誤則鐵汁壅塞爐座受傷或致轟炸故開辦之初必須多用洋匠而一切運鐵之輪剝各船鐵山運道煤井各事雖止一爐所費亦不能甚少迨至日久工熟成貨日精出煤日旺洋匠日少則成本日輕查湖北煉鐵廠原議專爲製造鐵路鋼軌而設本爲力杜外耗起見光緒十六年二月海軍衙門戶部原奏內曾經聲明設廠煉鐵乃開辦鐵路鑄造槍礮

第一要義又云煉鐵爲造軌之基等語海署疊次來電大意相同十六年正月文電云正題宜先鑄軌鑄械次之等語尤爲深切著明是現在關東修路湖北造軌本是相因而起十六年三月內籌辦設廠之初卽經商明直隸督臣李鴻章接其電覆云將來鄂鋼煉成自可撥用等語是以特購製造鋼軌魚片鉤釘各機器分建各廠中國既能造軌斷無再購洋軌之理查關東議定每年修路二百里曾向李鴻章詢明每年約需軌價十九萬餘兩其橋梁各種鐵料尙不在內鄂廠造軌乃係官物必須先發官本不比商賈圖利可以墊辦以常理論

之似應由北洋每年將此二十萬先行支付以爲工本
惟北洋造路工費浩繁未便全行預支竊擬將湖北湖
南兩省每年應解北洋鐵路經費各五萬兩兩省共十
萬兩截留劃撥充用作爲預支軌價此乃鄂廠應得銷
軌價值並非無故分用並擬再由湖北糧道無礙京餉
之雜款內借撥十萬兩作爲代北洋籌墊軌本之用兩
項共計二十萬兩造軌之外兼製各種鋼料鐵料以供
各省行銷其劃扣北洋經費之十萬兩俟軌成運津後
核計實用若干尙短價值若干由津補足在北洋不遇
預支半價後付半價似亦酌中平允先後一轉移間爲

日無多以後每年卽照此辦理卽使日後北洋需用鋼
鐵較多價至數十萬亦只先劃留此數北洋所購外洋
鋼軌每噸價銀三十兩鄂軌初經開造工費較多然亦
只願比照洋軌價值無須加多各料是否合用儘可聽
北洋依法試驗或謂中國鋼軌不能經受壓力不知大
冶鐵鑛厯寄外洋考驗皆謂極佳且造軌所用尙非極
精之鋼鄂省製煉皆依西法與洋廠所造無異確無不
受壓力之慮其糧庫借款俟兩年後鐵務日暢自光緒
二十二年起由鐵廠分爲十年歸還此外不敷之數仍
由槍礮經費項下勻撥應用緣鐵廠爲槍礮廠之根必

先煉有精鋼方能製造以彼助此尤爲允協且此時槍礮廠尙未造成安配機器亦需時日計精鋼煉出之日始屆開機製械之時臣自當設法兼顧並無窒礙偏廢之處如再有不敷臣所設織布局現已告成陸續加工開織機勢似甚順利明年當有贏餘亦可酌量撥補鐵廠之費以後體察情形如鐵務日漸暢旺再當全開兩爐總之以湖北所設鐵廠槍礮廠織布局自相挹注此三廠聯爲一氣通盤籌畫隨時斟酌互相協助必能三事並舉各觀成功以後斷不致再請部款此項開煉成本概係由外省自籌較之南北洋製造各局歲需支撥

庫款七八十萬福建船政亦歲撥數十萬者辦法迥不相同甘苦難易判若霄壤合無仰懇天恩俯如所請鐵務幸甚微臣幸甚惟是此舉之關係大局及創造之種種艱難有不敢不詳陳於 聖主之前者竊惟采鐵煉鋼一事實爲今日要務海外各國無不注意此事而地球東半面凡屬亞洲界內中國之外自日本以及南洋各國各島暨五印度皆無鐵廠或以鐵礦不佳煤不合用或以天時太熱不能舉辦中國創成此舉便可收回利權各省局廠商民所需卽已甚廣且聞日本確已籌備巨款廣造鐵路原擬購之西洋若中國能製鋼軌彼

未必舍近圖遠是此後鋼鐵煉成不患行銷不旺不特此也各省製造軍械輪船等局所需機器及鐵鋼各料歷年皆係購之外洋上海雖亦設煉鋼小爐仍是買外洋生鐵以煉精鋼並非華產若再不自煉內地鋼鐵此等關繫海防邊防之利器事事仰給於人遠慮深思尤爲非計溯查光緒十六年正月海軍衙門來電總以無一仰給於人爲斷一語堅定懇切洵爲不刊之論若僅云杜塞漏卮猶其淺焉者矣此事係中國創舉原非習見習聞之事或慮年年需款沿以爲常或謂卽煉成鋼鐵亦無大用此乃未悉中外情形之言廟謨深遠自能

鑿燭無遺至此項工程之艱鉅實爲罕有機器之笨重
名目之繁多隨地異宜隨時增補洋匠亦不能預計而
起卸之艱難築基之勞費爐座之高大布置聯貫各機
之精密鑿鑿修路開煤煉鋼之紛歧尤非他項機器局
可比而最難者爲圖軌兩端各廠總圖分圖極爲精密
多至數百紙皆寄自洋廠到鄂廠又須分畫各段細圖
大爐焦炭爐各軌皆係洋製方圓斜正式樣數十種每
一大爐需軌數十萬塊皆編有號數依次修砌一塊不
能錯亂其爐皆內軌外鐵洋廠製造此軌又甚遲緩數
萬里換船轉運破損尤多動須補購卽不能不停工以

待三年以來與出使大臣函電交馳派員加費百計催促近始太略寄全每一批機器物料運到多至數萬件或十餘萬件必須數十日方能點清每一種機器必須四五箇月方能安配完好至於其餘一切物料若廠屋之鐵梁鐵柱廠基爐座路工之水泥火泥等類無非來自外洋其最近者中等火輒則取之開平極大石料則取之湖南配補殘缺器零件則取之上海香港無一省便之事臣日日督催不遺餘力此時漢陽鐵廠及大冶鐵路漢口及上海領事洋人來觀者絡繹不絕皆謂此爲應辦急務並據洋人皆云比外洋迅速已多至於籌

款既如此艱難臣身任其事若經費不繼卽是自困之道故臣極力綜核務求節省每定一機器開一工程必與洋匠多方考究令其務從撙節辦法大冶鐵路五十餘里鎗山填湖買地綏民亦極費手至開煤一事尤極艱辛訪尋兩年有餘試開窿口數十處始得此兩處堪以煉鐵之煤須用西法鑿堅石數十丈以下乃得佳煤既開直井又開橫窿又須開通氣之井及開煤之巷出煤乃多又須購製鑽地壓氣抽水起重洗煤挂綫運煤各機又須造煉焦炭爐數十座然將來所費斷不致如直隸開平煤礦之多臣力小任重時切悚惶加以督工

籌款事事艱難夙夜焦急不可名狀惟以此事爲自強
大計所關既奉諭旨飭辦不敢不身任其難惟有竭其
愚誠殫其緜力專就湖北鐵布槍礮三廠通籌互濟相
機趕辦期於必成以仰副 聖主開物成務力圖自強
之至意斷不敢因工鉅款絀中途停廢以致創舉無效
貽譏外國惟大爐開煉之始先須將配合煤礦分數逐
漸考校精詳一一合式且必須開火一月大爐方能燒
熱開爐以後卽須晝夜鎔煉不能停火停則與爐有礙
且多耗費故一切事宜必須早爲籌定惟有籲懇聖恩
敕下海軍衙門戶部早日定議行知俾得趕早布置將

各項工程物料洋匠華工及早核記俾免延緩虛糜臣
無任惶悚屏營之至

硃批該衙門速議具奏欽此

覆陳查緝會匪情形摺

光緒十九年四月二十六日

竊臣等前承准軍機大臣字寄光緒十八年十一月初
六日奉上諭翰林院代奏編修陳鼎請嚴防各省會匪
一摺各省會匪疊經降旨查拏而根株未盡深虞蔓延
亟應銷患未萌妥籌辦理除原奏請酌派各州縣銀兩
備賑一節殊非政體著勿庸議外所稱使州縣官徧搜
伏莽總兵官巡閱境地起用各軍舊部熟習地形之人

延攬天下將才各條著悉心詳籌奏明辦理原摺均著
鈔給閱看等因欽此當經恭錄札行藩臬兩司欽遵查
照原奏所陳各節詳悉籌議去後茲據湖北按察使陳
寶箴會同布政使王之春詳稱竊惟近來各省會匪散
布之廣幾於無地蔑有湖北界連川陝湘皖諸省水陸
交衝匪徒溷跡往來尤難究詰光緒十七年長江上下
疊有閭閻教堂之案兼盤獲私運軍火一事會匪乘機
思逞欽奉諭旨通飭嚴拏當經臣等督飭司道暨各將
領設法懸賞購捕訪查首要姓名攜帶眼線分往本省
及下江湖南等處多方跼緝拏獲糾黨謀逆之著名渠

魁高德華究出私購軍火一案以李洪爲首又疊獲濮雲亭葉坤山陳華魁吳有楚陳先知汪殿臣等各巨慝並此外首要次要各匪分別懲辦不下數十百名近又經臣之洞派員在湖南地方疊獲首匪匡世明會鳴臬均係兩江督臣咨會查拏私購軍火案內之要犯所有著名渠魁現已拏辦略盡均經隨時奏報并將出力員弁擇尤保獎在案近來疊經出示曉諭從前被匪脅惑愚民均多畏法自新繳燬票布又經奏明添募營勇分紮要地彈壓巡防民氣尙覺靜謐惟徒黨已多糾結已久一時猝難淨絕誠如諭旨所謂根株未盡深虞蔓延

者自當持久不懈以爲消患未萌之計惟有慎選州縣責成各道府州考核修明政刑聯絡公正紳耆以爲耳目編查保甲以知良莠申諱匿之禁嚴養癰之罰有能緝獲開堂放票首要會匪者仍照異常勞績予以獎勵誘脅者戒勿妄拏以安反側賞罰旣明吏治自飭此又消患未萌之本務而非一時一事之比似不必如原奏所稱以州縣兼畫輿圖徧搜伏莽轉致閭閻驚擾也至原奏所稱延攬天下熟悉地形之士以儲將才一節查形勢爲行軍要略現在湖北省本繪有地圖每年提鎮以下輪流巡閱與鄰省會哨皆必攜帶營汛駐紮各圖

參稽考證於所轄關津險隘頗能講求似與該編修原奏脗合第形勢特爲將之一端大將當以智略爲優偏裨當以樸勇爲尙非熟悉地形卽可盡爲將之能事若專以輿圖之事責之則繁密細碎將才必非所堪又如起用各軍舊部熟悉地形之人以飭營務一節現在湘淮宿將除已經物故外多列提鎮大員次亦皆官副參游等官湖北綠營鎮將實缺候補各員及水陸各勇營統將如熊鐵生劉鶴齡宋德鴻樊國泰謝得龍常道漢周德升諸人大率皆咸豐同治間勲績顯著之各統兵大臣舊日部將均經臣等酌量才具長短隨時委用仍

時有投効來鄂以待驅策者是原奏起用各軍舊部之說現正舉行無須更議等情由該司等籌議具詳前來臣等查該司等所陳均屬湖北現在查緝會匪實在情形謹合詞恭摺覆奏伏祈聖鑒

殊批知道了欽此

鐵廠成本不敷另籌借撥摺

光緒十九年五月十四日

竊臣承准總理海軍事務衙門咨開光緒十九年三月二十九日會同戶部具奏速議鄂省鐵廠豫籌開煉成本一摺本日奉旨依議欽此黏鈔原奏咨行到臣查鈔奏內稱戶部查該督擬由湖北糧道借撥銀十萬兩應

如所請辦理至李鴻章電稱鐵路經費礙難挪用請由戶部代籌一節查帑項支絀戶部指撥爲難爲該督所深悉所有戶部設法代籌之處礙難辦理等因竊惟鐵廠先行開煉一爐前奏歲需經費五六十萬兩實與洋匠多方考究樽節估計無可再省現在鋼鐵各廠將次告成但開辦煤井建造焦炭爐各項工程正在喫緊之際蓋開煤井煉焦炭實爲煉鐵之根必須趕辦而修理演試各種機器添雇洋匠教練藝徒修守鐵路填築廠內餘地各事端緒甚繁需用甚急均須迅速督催布置周妥始能開煉即使前奏所請借撥之二十萬兩如數

撥到而其餘尙須專指槍礮廠經費湊足究竟槍礮廠經費能收若干能挪用若干尙未可知已恐不敷今鐵路經費十萬兩既不允截留短此十萬鉅款實屬無從措手北洋大臣李鴻章亦深知開煉要需勢有難緩故有請戶部代籌以觀厥成而免作輟之議今此項經費戶部既不能代籌只可就湖北本省自行設法騰挪借撥以免功虧一簣再四籌維惟有仍由湖北糧道庫無礙京餉之雜款再借撥五萬兩又查湖北鹽道庫尙存有長江水師申平銀五萬兩一併借撥應用以符原奏之數仍照原議統自光緒二十二年起分作十年歸

還此兩項於京協各餉均無妨礙至戶部原奏稱借撥糧道銀兩究係何項雜款將來按期歸還均須隨時聲明報部等語查前奏所借係免費水脚幫津三款此款向係留備本省奏撥餉需之用此次擬借五萬仍就此三款內撥用將來歸還時自應與申平一款一併隨時報部合併陳明合無仰懇天恩敕下海軍衙門戶部迅速核覆俾得開辦試煉一切事宜以免作輟延誤殊批該衙門議奏欽此

籌撥織布局官本摺

光緒十九年六月初四日

竊臣前承准總理衙門咨議覆詹事志銳奏整頓商務

一摺原奏內稱棉布爲用甚廣大利所歸亟宜自謀織造以塞漏卮查上海已設立織布機器局兩廣總督張之洞亦經奏明設局織布因時興利實爲不可緩之舉必須實力講求逐漸推廣方能有濟如果經費不敷或撥官本或招商股隨時分別奏咨辦理等因奉旨依議欽此欽遵在案茲查湖北省織布官局業經工竣布機一千張陸續教練開織所織布匹甚爲堅潔適用所紡棉紗堅韌有力遠勝洋紗銷路頗暢官商士民咸曉然於此舉爲有益地方之事大率一年需用棉花數百萬斤皆用湖北本省所產之花間或參用江南通州花紡

織工徒需用二三千人皆用湖北本地之人此舉無論於大局何如要之銷湖北之土貨養湖北之貧民則已確有明徵惟購儲棉花并隨時添補修改機器各件以及洋匠華工需款甚鉅查該局購機造廠經費均係臣前在廣東設法籌捐並未動用庫款自經兩廣督臣李瀚章奏請將布局移設鄂省後又添購軋花機器及廠屋鐵料暨外洋運腳保險等費增款銀三十餘萬兩除前經奏明由李瀚章撥來息借晉省存款二十萬兩并由湖北藩司善後局議詳將向來存當生息善舉公款銀十萬兩分向當店提還改發布局應用生息外其餘

皆係向商號暫借及挪借善後局閒款墊用現在開辦經費亟須籌措大率成本愈厚開機愈多則行銷愈暢盈餘愈多統計一年需費甚鉅而濬源塞漏可久可大誠如總署所云因時興利實爲不可緩之舉自應遵旨籌撥官本應用以阜民生而保利權查布局開辦經費至少需銀二十萬兩左右始足以資周轉鄂省司局正雜各款各有專支急切實無從籌此鉅款惟查有近年積存實當捐一款係光緒十一年前督臣卞寶第奏明辦理乃係新籌之款并經奏明留於本省儲備緩急之需奉旨允准在案現在其積存銀八萬兩以之撥充布

局開辦經費照章生息允爲妥協布局購儲棉花爲目前最急之務刻不容緩已據該司道議詳將此款全數提交布局悉購棉花以應急需惟所需之花尙須廣儲急購不敷尙多容臣督飭司局隨時設法籌措殊批該衙門知道欽此

勘明藕池等口情形妥籌辦法摺

光緒十九年七月十八日

竊臣等前承准軍機大臣字寄光緒十八年五月初四日奉上諭都察院奏湖南京官郎中張聞錦等以水患日迫請復舊隄繪具圖說赴該衙門呈遞一摺據稱湖北藕池口等處湖隄潰決灌入湖南常德府屬被害最

重惟有規復舊隄堵塞潰口或於藕池口東南築長隄一道兼濬深洪俾引入大江由江入海以消上下游水患等語藕池口潰隄情形前經張之洞親往查勘奏陳大概擬與湖南巡撫會商辦理現在該處水勢究竟如何該督撫等會否妥籌辦法此次張聞錦等所呈各節是否可行著張之洞譚繼洵張煦會同悉心商酌妥議辦理總期於湖南北兩省地方均無妨礙以弭水患而衛民生原摺呈均著鈔給閱看原圖一件並著發交張之洞等閱看後仍行繳回將此各諭令知之欽此遵卽恭錄咨行分委前署湖北荆宜施道曹南英湖南岳常

禮道廷杰督同兩省委員湖北知府札勒哈哩唐樹滋
湖南知府徐培元暨滇湖各縣馳往藕池口一帶地方
率同原遞公呈之常德府紳舉人梅安等查照所呈各
節會同詳切履勘並將調弦虎渡各口派員分別測量
繪具圖說會同稟覆時值水勢尙盛猶恐測勘未確復
經臣之洞選調廣東精於測繪之委員老穎安學生潘
元普等來鄂檄委湖北荆宜施道周懋琦候補道裕庚
帶同該員生等於春汛未到之先馳往藕池口內外覆
勘將緊要處所重加測量繪圖貼說分晰稟覆先後飭
據湖南布政使何樞湖北布政使王之春核議具詳請

奏前來臣等查常德府紳士刑部郎中張聞錦等原呈請堵塞藕池潰口欲障荆江濁流使無南汜自係爲水患日深保衛桑梓起見惟事關湖南北兩省利害必須統顧兼籌且查所呈各節於現在江流改道之情形及各口能否疏濬之地勢尙未深考茲經疊次詳勘熟議臣等覆加考核往復籌商僅將藕池等口實有礙難堵築情形敬爲我皇上縷晰陳之查藕池爲荆江南岸大隄當日因江心沙洲太多逼江溜直趨南岸藕池正當西南頂灣之處咸豐二年遂致冲成巨口分引大溜常德內出之水不免壅遏不暢然江水過藕池繞石首

始北歸入正洪亦甚迂折不便自光緒十三年王家大路迤北之沙洲被江水自行沖出新口徑趨張家灣水勢較順西南一帶天心洲日漲江溜爲沙洲所遏日趨日北由王家大路新口東北流歸大江正洪者日多南入藕池潰口者日少藕池口門當日之正值頂灣者今日已在新口之下實測今日藕池潰口之水較之昔年初潰時已減其半現在入藕池口門內數里卽有淤沙沙日墊則水日緩以後入口之水自當日見其減而王家大路改道後大江縈迴如玦北岸三面環水僅以一綫長隄爲捍蔽上潰則荊州府城當之下潰則監利當

之潛江沔陽等處亦必同受其害自咸豐二年藕池潰
口以來四十餘年南北相安無事上年常紳等甫興築
復之議監利縣紳舉人熊登校等亦卽具呈瀝陳攔阻
若一旦堵塞荆民必羣起相爭南省依隄爲命者北省
必將與隄爲仇卽使強欲議堵此工恐亦難成至於藕
池口門廣三百五十五丈中洪深三丈盛漲加高二丈
餘工費過鉅斷非數十萬金所能辦縱使辦成盛漲亦
難深恃此堵塞藕池口之難也又如常紳所呈於藕池
口東南隅鮎魚鬚橫築長隄一道截引荆江南汜之水
使折而東逕調弦口經流故道一節查鮎魚鬚在石首

華容交界地方距藕池口門五十里并爲公安安鄉等
水東流入湖之路原圖擬截流橫築長隄一道與兩岸
淤洲隄垸相接不忌果築此隄將使藕池及公安安鄉
之水從何入湖豈不汎濫華容安鄉一帶更致多灌常
德何能強令曲折繞歸調弦口出江至於口門廣一百
八十八丈深二丈二尺工費難舉尙可不計舉人梅安
等隨同印委各員履勘經各員指示詢問目覩情形亦
自深知其謬止鮎魚鬚築隄之難也原圖又擬塞藕池
而濬虎渡調弦兩口以洩荆流查虎渡口在藕池之上
游一百七十餘里本係自古以來分引江水南流之口

惟歷年沙淤已久口門甚窄口內五六里卽已淺至數尺冬令幾不通舟楫實有難疏卽使能疏而下塞藕池上濬虎渡目前亦斷無此物力且下游藕池旣塞去路壅滯江水上游之直注虎渡者必多澧州及所屬安鄉必遭壅遏淹浸緣安鄉湖身近來半已淤成沃壤水無所容迴非五十年前形勢利於常德而害於澧州亦未得爲善策至調弦口在藕池口之下游考之志乘此口原係分洩江水入湖之口並非引放湖水入江之口無論現在疏濬不易誠使疏之則內水能出外水亦能入盛漲時江水倒灌仍南歸鮎魚鬚曹家廠一帶此塞彼

灌有何分別何能引江水東流入海此疏濬虎渡調弦
兩口之難也又據舉人梅安等面稟印委各員以原圖
不免錯誤請改從鮎魚鬚對岸各港口築隄障水使無
西汜等語查所指各口自曹家厰至扁擔河地勢紆迴
自北而東而南將及百里港口紛歧堵之不勝其堵尤
恐衆流東匯華容獨當其衝且墮遏常德內水者尙有
陡湖黃金河及澧州安鄉之水皆在其內並非盡藕池
之水此堵築鮎魚鬚對岸各港口之難也惟查常德一
府爲辰沅酉澁諸水所匯府城正臨水濱每當江湖並
漲宣洩無所迫近郡城常紳等所慮亦係實在情形臣

等職任地方深知湖南常德水患多年居民甚以爲苦
豈不欲力籌善策俾其永無氾濫無如兼權熟計旣覺
妨礙太多且亦毫無把握熟察今日常德水患尤以南
洲占地阻水爲一大端不僅在來水之路多而在容水
之地隘消水之路阻蓋內水若暢外水漸緩則江湖水
勢可以相敵雖遇盛漲時互相消息輸注亦不甚爲害
事關兩省惟有擇其有益於湖南而無損於湖北者妥
籌舉辦一曰禁新沅查洞庭一湖受納川黔楚桂之水
廣袤八百里以能容爲量自康熙以來民殷物阜生齒
日繁小民就湖灘荒地築圍墾田逮及乾隆年間湖灘

淤地無不築圍成田濱湖隄垸如鱗已有與水爭地之勢前湖南巡撫陳宏謀喬光烈等疊有創毀私垸永禁新增之奏均經奉旨准行歷年既久地方官奉行不力湖中隄垸日增加以藕池既潰江水濁流灌入沙淤壅遏龍陽華容安鄉三縣境內新長南洲廣袤幾二百里南洲以外尙有私垸多處侵佔湖面現在西湖已涸其半東湖亦漸淤墊水無所容橫溢四出升任湖南巡撫王文韶疏稱湖北則荆江大隄受其害湖南則濱湖州縣被其灾湖中之水既漸變而爲田湖外之田將胥變而爲水湖南之大患無有過於此者等語確有明徵日

前辦法惟有查明湖中舊有隄垸限以定數不准再有
增加其濱湖淤洲及私垸有礙水道者酌量開挖創毀
如有違禁私築水垸私墾官荒者卽令地方官督飭刻
除分別嚴懲以期讓地與水使有所歸已由臣之洞臣
大澈嚴札出示懲禁一曰疏北港熟察形勢似應於安
鄉縣屬之北夾子起以及冷飯洲新開官河沙夾西港
南嘴白沙蕭公廟舵桿洲等處節節挑濬再將布袋口
開掘深洪俾復舊觀以暢湖南諸水入湖出江門戶惟
經費甚鉅籌款不易且恐有旋疏旋淤之病應由湘省
體察情形以後量力從容舉辦現查新開官河地處適

中爲水必爭之地擬先飭令該處水師營官將淤洲阻
遏地方開通巨口以待汎水引溜刷沙俾盛漲有所消
洩一曰培城隄常德大郡連年水患自宜先籌保護之
法該府城臨水一面因城爲隄臣大澈因查閱營伍親
至常德巡視府城上南下南各門外附郭市廛過密城
垣無法培厚惟筆架城一段最當衝要其地並無民房
又城內正對府學處所地段亦極緊要已咨北洋大臣
李鴻章購到唐山廠上等塞門德土三百餘噸運赴常
德爲修城之用其城外石隄并以此土代灰重加培修
水至不致沖缺庶城隄堅厚雖遇盛漲亦可無虞以上

三端雖爲補偏救弊之方而目前人力所能爲者不過如此蓋自江流漸復故道以後藕池受水已漸減少而常德內水實爲南洲所阻若僅塞藕池而不能剷去南洲則未必大利於湖南而先有害於湖北加之費旣太鉅工亦難成辦理實無把握至堵築他口詳加體察亦多窒礙惟禁新垸疏湖港培城隄數條雖無近功較有實際庶不悖於朝廷兼顧南北兩省之至意謹將勘測藕池口一帶水道繪圖貼說恭呈御覽
硃批知道了圖留覽欽此

請鑄銀元摺

光緒十九年八月十九日

竊照湖北省據江皖上游地當南北要衝漢口宜昌兼爲華洋通商口岸商賈雲集用錢最廣向章各州縣徵收丁漕各局卡抽收釐金鹽課皆用制錢完納每年需用之數甚鉅自同治以來滇銅不旺洋銅價值日昂鼓鑄久停青銅制錢本已日罕日珍近來市面現錢日形短缺而商民交納官項以及民間日用交易皆需此物若聽其以小錢充數則官項受虧亦非政體若挑選過於認真則商民嗟怨大率湖北各府州縣城鄉市鎮不惟制錢短缺卽粗惡薄小之現錢亦甚不多惟以一紙空虛錢條互相搪抵民間深以爲苦而無如之何通省

情形相同近年鄂省商民生計維艱市面漸形蕭索此實爲一大端前督臣裕祿前撫臣奎斌以鄂省錢少價昂曾有請禁輪船裝運制錢出口以平市價之奏臣等復以制錢缺少疊經督飭司道籌議禁販運拏私鑄查銅鋪懲私毀並嚴禁回空鹽船裝運制錢出省及稽查輪船夾板船裝運出口按照約章核實辦理力圖整頓無如來源既少民生仍未能紓又以錢少由於鼓鑄無銅查訪鄂省銅鉛各鑛尙有數處如鶴峰州之九台山安陸縣之銅古黃金等山均有銅鑛派員分投去辦或以道遠運費過多或以鑛少難得大脈辦理均無把握

目覩商艱民困補救無方不得不亟籌一變通利濟之法督同司道再四籌商僉以廣東奏准開鑄銀元利用便民成效昭著蓋銀元大小輕重均有定式取攜甚便尤利行道商民便之不獨閩廣江浙及江西安徽湖南等省商民貿易通用銀洋如湖北漢口沙市一帶向來亦多行用至商輪來往則全用洋銀交易利權所在尤當因時制宜惟有援照廣東成案開鑄銀元庶可以補制錢之不足緣廣東銀元若由鄂省遣道購致運費匯費耗折太多且不能隨時濟用擬卽在鄂省自行鑄造購置鑄造大小銀元之中等機器全副先行試辦規模

不必甚大計購辦機器創造廠屋共需經費銀四萬餘兩查光緒十三年鄂省開鑄制錢曾經奏明撥借司庫質當捐銀二萬兩換錢三萬串借撥鹽釐五成外銷公費等項錢二萬串共錢五萬串發商生息爲彌補銅鉛折耗之用旋因洋銅價增奏明暫停鼓鑄已將此項錢五萬串提還藩庫鹽道庫存儲留備鼓鑄要需約合銀三萬數千兩擬卽動支此項錢文作爲開鑄銀元購機造廠之用其不敷之項由司局設法於外銷之款籌足銀元大小式樣輕重分兩及繳納支發各款各省行用章程廣東均有戶部議准成案可循通行各省商民稱

便已久一切均擬仿照成案辦理惟銀元所鑄廣東字樣改爲湖北所有湖北省各局卡釐金鹽課均准商民一律用銀元交納支發官款一體酌量搭用俱按照當時洋銀市價核算沿江沿海各省口岸及內地商民准其與廣東銀元一體行用一切聽其自然毫不勉強至籌解京協各餉向用紋銀者仍用紋銀目前與制錢相輔而行旣可以紓民困亦可保利權似爲救時急務將來中國銅產日旺鼓鑄漸充則制錢與銀元仍可相濟爲用並無窒礙據湖北藩臬兩司鹽法道會同善後牙釐兩局司道籌議援案具詳請奏前來合無仰懇天恩

俯准照案開辦以便民用而保利權地方幸甚如蒙俞允臣等當咨取廣東各項章程體察情形酌量仿照辦理

殊批戶部議奏欽此

出省查閱營伍暨水師兵輪摺

光緒十九年九月十五日

竊臣前將出省校閱營伍及查看江夏大冶等處煤井鐵山運道各工程日期奏報在案當經於八月二十二日自省起程乘坐兵輪泝江而上至江夏所屬馬鞍山地方查看煤井既畢展輪下駛至黃州府二十四日調齊黃州興國德安等營弁兵合操陣式步伐整齊槍礮

連環應節將備弁弓箭枝尙屬有準各將弁近年來經臣飭令一律操演後膛洋槍均能極力講求中靶約在六成以上器械馬匹亦皆精壯足額當場分別賞罰並嚴飭各營將官認真督率訓練汰革疲弱力除積習校閱事竣卽開行至大冶縣石灰窯馬頭登岸由鐵路行五十餘里至鐵山鋪查看運道鐵路工程鐵山鑛石情形及開鑛軋鑛各種機器並至王三石勘視煤井順道乘輪駛赴田家鎮閱視南北兩岸江防礮臺江面頗窄水流甚急地方形勢甚爲扼要惟礮臺布置一切尙須從容講求隨卽乘輪上駛於二十八日回省據長江漢

陽鎮總兵高光効岳州鎮總兵張捷書稟請將該兩鎮水師一體校閱當經酌調礮船數十號來省於九月初五日將漢岳兩鎮師船湖北鐵字三營水師襄河中前左三營水師及兵輪各船調集距省城三十里青山地方閱看水操長龍舢板往來洪濤巨浪之中陣法嚴整排礮齊一進退攻擊駕駛均極靈便楚材測海金甌兵輪三艘於江中設靶演放巨礮均能命中致遠當經分別獎賞各水師飭令分別回防惟湖北通省綠營向皆沿用土槍旣覺遲鈍亦難及遠不足以備緩急現經臣飭令一律操演前膛洋槍其實缺候補各將弁於每

營酌挑兵勇練習後膛洋槍甫經陸續發給操練且現在鍊鐵全廠告成亟須講求開爐試鍊辦法督催煤井工程正在喫緊之際亦未便遽離省城所有安襄鄖荆宜施等處營伍容俟明年省城要務漸有端緒各營操演洋槍漸臻純熟臨時體察情形再行出省簡校以求訓練實際

殊批知道了欽此

張文襄公全集卷三十三終

吉林慶 珍校

張文襄公全集卷三十四

奏議三十四

煉鐵全廠告成摺

光緒十九年十月二十二日

竊臣奉旨籌辦煉鐵事宜自開辦以來歷經隨時上陳並於本年二月內詳晰奏陳在案自三月以後機器物料陸續運到臣督飭各員及洋匠多方激勵極力趕辦所有煉生鐵大廠及機器廠鑄鐵廠打鐵廠業經於三月前完工其煉貝色麻鋼廠煉熟鐵廠此兩大廠均於五月完工其煉西門士鋼廠造鋼軌廠造鐵貨廠此三大廠因補換破碎短數火甄及未齊機器鐵料運到稍

遲於七八兩月先後完工此外尙有造軌所需之魚片鉤釘廠其機器本係後訂於五月內始自外洋續行運到督催趕辦亦於九月中旬完工統計全廠地面東西三里餘南北大半里各廠基自平地起至鐵柱墩及爐座機器諸石墩止均須填土高一丈一二尺不等大小十廠均須連爲一處共應填土九萬餘方已於九月中旬將開煉之日卽須施工處所一律填齊至各廠基以外現仍接續補填其應加開水溝加培護隄廠內聯貫交通鐵路廠地鋪蓋鐵板各工隨時酌度情形辦理統計煉生鐵煉熟鐵煉貝色麻鋼煉西門士鋼造鋼軌造

鐵貨六大廠機器鑄鐵打鐵造魚片鉤釘四小廠以及
煙通火巷運鑛鐵橋鐵路各工江邊石馬頭起鑛機器
房現已全行完竣機器一律安配妥協其大冶運道鐵
路前已完工鐵山開鑛機器及軋鐵鑛軋灰石機爐四
座溜鑛石馬頭礪岸等工均已造齊江夏馬鞍山煤井
橫窿兩道均已開通陸續出煤大冶王三石煤井二處
石質極堅暗水太多工程過鉅其橫窿開通尙需時日
現在亟須開爐試煉惟馬鞍山井工雖成煤巷尙少工
徒未熟出煤尙未能多該處所設之煉焦炭爐甫經開
工火輒均自外洋運來破缺短數甚多電催補添尙未

運到洗煤機器及運煤之掛綫路機器屢經電催約須十一月間方能運到安設造成亦需時日自應查照從前奏案先行購運湘煤與馬鞍山所開之煤參用以應急需現於漢陽鐵廠內另行添設洗煤機煉焦炭爐以期早日興工至新爐試煉關繫甚鉅合配鐵礦灰石煤斤必須精詳慎重而洗煤煉焦炭兩事在中國工匠素未經見若煤質稍雜洗煉配合稍不得法卽至積灰壅塞風眼鐵汁不能下注凝堵爐門全爐損壞貴州青溪鐵爐覆轍可鑒必須先用外洋焦炭試煉兩月察其爐座之風力火力鐵礦之剛柔徐用內地之煤較量配用

方爲穩慎萬全至煤爲全廠之根必須自開自煉方能一律適用而且多出不竭目前工費雖多將來庶可經久實爲節省經費輕減成本之要策現仍一面督催各煤井工程並因全廠鍋爐及鐵山鑛機運道火車運鑛運煤輪船長年需用煙煤爲數甚鉅分飭於大冶縣之保安李士墩金盆地柏灣長陽縣之滋邱等處多開土窿以資各項雜用惟外洋開煤乃極重要而極繁鉅之事本係專門大舉每開一大井鑛工井工路工等項動需百萬內外與煉鐵另爲一事今湖北兼辦開煤數處而又別無經費辦理實爲棘手惟爲竭力統籌相機騰

挪設法趕辦目前正在演試機器修補各項機器零件
俟一切布置周妥十一月內卽擬燒熱爐座約須兼旬
方能熱透十二月間卽可試煉生鐵接續煉鋼造軌茲
謹將造成漢陽煉鐵全廠及大冶鐵山鑛機運道水陸
馬頭暨江夏馬鞍山大冶王三石各煤井工程仿照西
法於九月下旬照印成圖共爲五十六幅并於圖上貼
說恭呈御覽

擬定鐵廠開辦後行銷各省章程片

光緒十九年十月二十

二日

再准戶部咨令於鐵廠開辦後詳定行銷各省章程并

將所出鋼鐵數目分季造報海軍衙門戶部等語查中國自開鐵廠乃奉旨飭辦之件關係自強要圖凡我軍國所需自宜取資官廠惟賴戶部與各衙門及各省合力維持方足以暢地產而保利權至所出鐵貨既係動用官本均係官物且開辦之初工本較鉅行銷各省及出口運銷外洋自應一律統免稅釐以輕成本且臣近接出使日本大臣汪鳳藻來函日本現亦擬創設鐵廠擬派員來華觀看湖北鐵廠等語是外國皆汲汲於煉鐵一事則中國鐵廠尤宜多方護持振興以期暢旺所有北洋鐵路局及各省製造機器輪船等局需用各種

鋼鐵物料或開明尺寸或繪寄圖樣漢陽鐵廠均可照式製造與外洋物料一律適用至開辦之初工本猝難豫計其價值惟有暫照各省所購外洋鋼鐵時價應於議定需用物料若干價值若干後或先付半價或先付三分之一或酌付定銀應由湖北隨時體察情形與各該省商辦相應請旨敕下戶部總理海軍衙門總理各國事務衙門迅速核定章程通行各省查照辦理至漢陽廠所出鋼鐵數目一年之內或有分煉猛鐵之日或有修理機器爐座之日且鋼鐵等差種類甚多或視何項鐵貨需用較多較急卽行酌量多少分別製造若按

季報部端緒過形繁雜且不免參差似須滿一年後方能統計盈虛擬請每年奏咨一次以歸簡明而昭核實硃批該衙門議奏欽此

設立自強學堂片

光緒十九年十月二十二日

再治術以培植人才爲本經濟以通達時務爲先自同治以來總理各國事務衙門設立同文館創開風氣嗣是南北洋及閩粵各省遞設廣方言館格致書院武備學堂人才奮興成效昭著湖北地處上游南北衝要漢口宜昌均爲通商口岸洋務日繁動關大局造就人才似不可緩亟應及時創設學堂先選兩湖人士肄業其

中講求時務融貫中西研精器數以期教育成材上備
國家任使臣前奏明建立兩湖書院會有續設方言商
務學堂之議茲於湖北省城內鐵政局之旁購地鳩工
造成學堂一所名曰自強學堂分方言格致算學商務
四門每門學生先以二十人爲率湖北湖南兩省士人
方准與考方言學習泰西語言文字爲馭外之要領格
致兼通化學重學電學光學等事爲煥學之入門算學
乃製造之根源商務關富強之大計每門延教習一人
分齋教授令其由淺入深循序漸進不尙空談務求實
用所需經費暫就外籌之款湊撥濟用俟規模漸擴成

效漸著再行籌定專款奏明辦理以爲經久至計

硃批該衙門知道欽此

接設安陸電綫片

光緒十九年十月二十五日

再前因襄陽地當邊要伏莽素多且襄河湍悍時虞潰決安陸襄陽兩府沿河各州縣隄工關繫民生利害必須赴機迅疾方能有備無患當於光緒十六年奏明將荊州沙市電綫接造至襄陽并撥歸商局經理在案自襄陽通電以後信息靈捷於襄郡隄工及襄陽所屬教案會匪諸事均能應機籌辦裨益實多惟安郡鍾祥隄工相距較遠綫路雖經過鍾祥境內第在對河地方無

通報之所倉卒尙難得力必應於商綫經過較近之處橫添官綫一段接至安陸府城內方於籌辦鍾祥隄工各事可期爰速綫路相去不過數十里而中隔襄河須接水綫當經派委沙市電報局委員直隸候補同知黃邦俊隨帶工匠及水陸電綫工料等件前往勘路興工旋據稟報陸綫由荊門州接達水綫由安陸府城外中渡安設一律工竣所有購辦水旱綫桿物料工作等項共支用銀四千七百二十八兩由善後局如數發給查所接安陸官綫係爲防護鍾隄而設惟由官經理以後修理巡護及局中常年經費所需甚多若仍撥歸商辦

則與襄樊商綫呼應靈通而經費可期節省至所用經費銀四千七百餘兩當經與商局議定作爲存款由商認還但現在商報無多一時乏力墊繳應俟將來報費暢旺再行飭其分期歸結以清公款

硃批該衙門知道欽此

籌辦育嬰摺

光緒十九年十一月十四日

竊臣等前承准軍機大臣字寄光緒十七年九月十三日奉上諭御史恩溥奏各省教案皆緣育嬰而起請飭廣設育嬰堂一摺所奏不爲無見育嬰一事從前疊奉諭旨通飭辦理現在教案繁興半由各國育嬰起釁若

使地方官籌辦盡善自可隱杜亂萌惟各省情形不同全在疆吏因地制宜委用人立法周備庶日久奉行不至滋生他弊著各直省將軍督撫悉心體察妥爲籌畫總期實惠及民以恤窮黎而弭隱患原摺均著鈔給閱看將此各諭令知之欽此遵卽恭錄咨行欽遵辦理在案伏思湖北地方沿江口岸華洋雜處教堂甚多防範偶有未周匪徒從中煽惑易釀事端是育嬰之舉在湖北尤爲當務之急當經分派員紳馳赴各屬會同地方官紳周歷城鄉切實勸導設法籌捐的款或因或創竭力擴充妥定章程以垂久遠其收養之法大率分堂

養助養兩端如經費充裕建堂雇乳多多益善是曰堂
養或鉅款驟難籌集卽不必遽立新堂定雇乳媼但按
月給費責令本生父母撫育是爲助養嗣據各府州縣
稟報先由地方官員捐廉以爲之倡紳商士庶亦多嚮
義樂施或以資產充公或以集會輸捐或於田房稅契
及本縣市鎮商賈認捐經費共襄善舉就地方之廣狹
繁簡因地制宜分設堂所公舉端正紳士以董其事所
收租息及歲捐月捐筒捐各款絕不假手胥吏該地方
官隨時親赴堂所留心查驗臣等仍督飭司道覆加綜
核並委員隨時密查其收養嬰孩名數並飭按季分別

造冊稟報俾資考核民間捐款較鉅者臣等發給匾額以示獎勵查自陸續開辦迄今兩年綜計一州一邑歲籌經費多者錢數千串以至數百串收養嬰孩多者數百名以至數十名各該地方官均能各就本處情形實心勸辦不遺餘力果能從此日加擴充孤幼皆得所養於厚俗弭患之道似亦不無裨益臣等自當隨時督察力求實際不令日久弊生以仰副朝廷恤民防患之至意

硃批該衙門知道單併發欽此

辦結麻城教案摺

光緒十九年十二月初十日

竊查本年五月間麻城縣宋埠地方因傳教生衅毆斃瑞典國教士二命一案接據府縣稟報當經派委湖北候補道李謙馳往督同黃州府麻城縣查辦彈壓緝拏正凶將教士屍棺派人妥送到省旋據獲犯高稿粍等九名訊供稟報復經派委湖北候補道裕庚馳赴黃州督同黃州府高蔚光麻城縣張集慶提集犯證覆訊確供定擬稟辦緣李稿粍徐全福李福伢劉玉城李金狗朱應吳治太陳觀受劉元燦分隸麻城黃岡等縣各在麻城縣屬宋埠地方受雇幫工及遊混貿易營生彼此均不認識該宋埠地方向無教堂亦無各國洋人傳教

本年二月間有瑞國教士梅寶善凌化雲帶同通事至宋埠對河之郝家鋪地方租賃李漢龍所賃郝姓後重房屋售書傳教鄉民未經習見人心驚疑謠言四起旋據該府縣迭次稟由江漢關監督漢黃德道惲祖翼照會代辦瑞國副領事丁乙尼諭飭教士回漢俟民情信從後始可前往復經該縣當面勸令早旋迭准該副領事照復已諭該教士等回漢以免滋事旋因梅寶善一人先回而凌化雲被教民慫恿仍留該處又經江漢關道惲祖翼據稟照會該副領事諭令速行撤回又准該副領事復稱梅寶善已親身往宋埠撤令教士及教民

回來以爲該教士必可遵照領事諭囑辦理詎梅寶善
又偕教士樂傳道同至宋埠後凌化雲雖歸而梅寶善
樂傳道又復久留不去該處五月十五六等日向有競
渡故事屆期男女聚觀甚衆卽有無知之徒私貼揭帖
等事該縣恐釀事端移知把總董開泰往接該教士等
暫爲移居縣城該教士爲衆教民所牽掣堅不肯動鵝
籠巡檢殷廷瑜又復親往勸其暫避巡檢署內亦不肯
從並雇有郝姓鑣手數名恃爲無恐至十八日有朱應
等數人路過教士門首聲稱欲看洋人甲長郝人和攔
阻爭鬧罵詈衆人愈聚愈多不知何人擲石將郝人和

額顱打傷教士令在地躺卧用藥敷治一面令鑣手等將朱應吳治太陳觀受劉元燦四人捉入細縛交郝人和等解送縣城收管時後門已爲衆所擁阻郝人和等係由前門潛出繞道赴縣而門外衆人不知屢向教士索人不應當有李稿粍同衆用石撞開後門齊入屋內遍尋未見見有郝人和受傷卧地血跡羣疑爲四人已死適又見前重房屋不知因何火起又疑爲打死四人後焚燒滅跡亂向教士尋毆兩教士情急爬登屋上持瓦抵禦衆亦隨之而上梅寶善因向李金狗撲跌落地被李稿粍上前拾取木桶首先毆打旋同衆人亂毆樂

傳道在屋眾人齊上追打亦被徐全福首先踢落下地復同眾按住亂毆均各當時身死李福仔劉玉城乘機同眾搶拾物件事後均各逃散旋經該縣驗明屍身棺殮填格具報經道員裕庚親提督同府縣覆訊供認不諱並由該府縣開具供摺一同稟報該道憚祖翼覆核無異案無遁飾查律載共毆人致死下手致命重傷者絞又例載共毆人致死亂毆不知先後輕重者無原謀坐初鬪者爲首又例載鬪毆之案若被死者撲毆閃避致令自行失跌身死者照不應重律擬杖八十又因失火而乘機搶奪但經得財爲從者杖一百徒三年於面

上刺搶奪字樣又律載不應爲而爲事理重者杖八十各等語此案李耜粍徐全福因眾人找尋朱應等四人未見疑爲已死共向教士尋毆李耜粍於教士跌落後首先向打徐全福於教士上房避禦首先踢傷下地旋同眾人亂毆身死當時人多手雜不知何人致死自應罪坐初鬪爲首李耜粍徐全福二犯合依共毆人致死亂毆不知先後輕重者以初鬪爲首共毆人因而致死者絞律擬絞監候秋後處決惟該二犯凶橫肇禍情節甚重查同治五年上海縣客民張桂金故殺法國巡捕巴龍身死一案經南洋大臣以事關中外交涉必須速

結應由總理衙門會同刑部另擬專條奏明辦理等因
旋經會奏提前卽辦以期速結奉旨允准在案是交涉
案件本有速結專條現奉准總理衙門十月初四日豪
電開此事必應速結等因自應比照成案從重提前辦
理由臬司陳寶箴詳請奏明請旨前來查此案李精杞
旣已撞門尋鬧致兩教士情急登屋復乘梅寶善自屋
上跌落下地之時輒卽首先毆打旋同眾人亂毆致斃
徐全福先同眾人尋打見樂傳道已經逃避上屋輒又
登屋追打首先自屋上踢落下地復同眾亂毆致斃該
二犯以不干已事首倡逞凶及至兩教士跌落下地之

時既非彼此互毆尤非情急抵禦乃復趕打亂毆致令
徧體鱗傷登時連斃二命實屬情凶近故非尋常亂毆
罪坐初鬪者可比誠如總理衙門來電其凶橫較尋常
亂毆坐罪較重復查李藕粦徐全福二犯向來俱係拳
棒教師人所共知經道員裕庚查明屬實是該二犯均
係素不安分之徒此次眾人初只亂鬧尙未敢公然下
手獨該二犯首先毆踢以致兩命慘斃幾釀衅端其爲
禍首罪魁實屬眾目共覩臣督同臬司江漢關道公同
核議此案並無原謀且在場鬪鬧之人甚多斷不能如
教士單開所指任意株累惟該二犯既經訊明情節甚

重與尋常亂毆坐罪者已有不同且事關交涉尤未敢
拘泥尋常例案似宜從重提前懲辦庶可期辟以止辟
自應比照成案奏明請旨遵行抑臣之愚更有請者查
湖北民情不靜處處與教堂洋人相齟齬自近年揭帖
之風大熾動思生衅光緒十七年四月武穴有毆斃英
國洋人二名之案是年七月宜昌又有焚燬法美英各
國教堂洋行之案光緒十八年六月穀城有焚斃教民
雷財義之母之案襄陽有焚燬楊家岡教民房屋之案
多方彈壓防不勝防本年又有麻城毆斃瑞國教士二
名之案若不嚴懲擬抵是小國之與大國辦法未能一

律殊於政體有妨且愚民游匪以爲毆斃洋人可不抵償必致不遵法令動輒殺傷各國洋人紛紛被害尙復成何事體儻以後滋事日甚豈不誅殺更多今擬請援案從重提前懲辦庶免愚民踵轍生衅多蹈法網惟瑞總領事屢次來文面議皆欲援照武穴案將該二犯立即擬斬當以彼係會匪煽動之時案情不同力駁之特此案固應與武穴案有所區別然亦未便稍從輕縱臣係爲熟籌交涉大局保全將來民命起見至此案究應如何辦理之處伏候聖裁至李福伢劉玉城因失火往看見眾人圍打教士據供並未幫毆惟見眾人搶物亦

隨同搶得零星物件李福仵劉玉城二犯應照失火乘機搶奪人財物但經得財爲從者杖一百徒三年例擬杖一百徒三年於面上刺搶奪字樣李金狗因失火往救兩次被眾擁送上房致令教士向撲落地雖據供稱并無毆打情事究屬不應朱應吳治太陳觀受劉元燦首先罵詈致釀衅端均屬不安本分李金狗朱應吳治太陳觀受劉元燦五犯均照不應重杖八十律各擬杖八十仍酌加枷號一箇月無干省釋此擬辦各犯之情形也其撫恤一節該兩教士同時慘斃情殊可憫惟與武穴燒燬教堂者不同現議兩教士各給與撫恤洋例

銀一萬兩補給失物書籍等項洋例銀一萬二千兩共折合庫平銀三萬零五十七兩一錢二分當經飭江漢關道送交瑞總領事收清其宋埠再往傳教一節查宋埠民情憤怒其勢洶洶目前必不相安斷難准其再往現議二十箇月後再往傳教若臨時實有不能去情形再由江漢關道照會阻止該總領事均已照覆照辦此議定撫恤及從緩再往麻城傳教之情形也竊查瑞國總領事柏固兩次來漢口議辦此事各國教士意欲藉端生事勢頗紛紜臣遵照總理衙門疊次來電指示辦法務期妥速議結多方開譬剴切辯論其窒礙難行者

皆已直言駁覆現已議允結案

硃批該衙門議奏欽此

奏報鐵廠開爐煅煉日期摺

光緒二十年二月初四日

竊臣於上年十月內業將煉鐵廠工告成各情形詳悉奏報在案查漢陽鐵廠日用鐵鑛灰石及煤炭至百萬餘斤之多參和配合裝運起卸處處均須周備方能興工冶鍊而工程浩大端緒紛繁有可分投並舉者有必層遞而進者兩月以來極力趕辦將廠基以外應行接續填土聯貫軌道等工次第辦竣一面開溝培隄一面演試機器大致均尙順適惟機具繁多皆極高大笨重

之件接連地段又甚廣遠初經運動必有生澁鬆脫走火漏氣之處西洋各廠均所不免當卽在本廠鑄鐵廠內修改完好現已一律完全運動如意茲諏吉於本年正月初十日將煨鐵爐兩座升火燒然之後先將鐵礦煨煉遞以備生鐵大爐熔煉之用緣大冶鐵礦鐵多而質堅本屬上品惟含有硫磺鐵性暑脆必先入爐煨煉使磺氣騰散礦質疏鬆煉成鋼鐵方能堅韌有力實爲成鐵之始基既經一面飭大冶鐵山委員洋匠迅速開采一面派定輪剝各船數號將鐵山開出鐵礦及灰石轆轤轉運漢陽常川不息令其供用不致缺乏一俟煨

有成效添募洋匠到齊卽當接煉各種鋼鐵至所開煉并目前出煤漸多仍當隨時督飭趕辦
硃批該衙門知道欽此

請建陳國瑞專祠摺

光緒二十年四月三十日

竊據湖北應城縣知縣高培蘭詳據舉人王承禧呈稱已故記名提督原任浙江處州鎮總兵陳國瑞功在桑梓愛慕弗忘已蒙恩於立功地方准建專祠請在於原籍應城縣地方援案捐建專祠等情詳經批飭司局核覆去後茲據湖北布政使王之春按察使陳寶箴會同善後局司道詳稱已故記名提督原任浙江處州鎮總

兵陳國瑞於咸豐初年投隸戎行轉戰安徽河南江蘇山東山西直隸等省及湖北本省地方所向皆捷生平戰績業經各督撫統兵大臣臚列具奏蒙恩宣付國史館立傳毋庸贅述而其在湖北勦賊之功則麻城一役尤爲卓著同治三年僞浮王陳得才等糾合陝西皖豫悍賊數十萬竄入楚境屯踞麻城縣屬之白果等處連營築壘勢甚猖獗迤北一帶多樹木柵長四十里該賊大股久踞麻城東南則分擾黃岡黃陂孝感西北則分擾安陸雲夢到處蹂躪民不聊生該故鎮奉命由皖豫入楚勦賊冒暑前進兵纔八百人不俟大軍齊集卽於

是日三股分五路進兵拔其木柵破其土壘擒斬大小
頭目百餘名餘衆驚潰下竄復追賊於蘄州蘄水羅田
廣濟等處至冶溪河與賊大戰殺賊數千人斃擒首賊
目亦衆賊敗奔潰至英山霍山之界其衆尙逾十萬該
故鎮與楚皖官軍合勦正酣戰時賊望見國瑞旗幟驚
呼大敗擒僞端王藍成春於陣陳得才服毒死遣散脅
從難民無數楚省賴以安堵江北大定其功最偉以上
諸戰功均經大學士李鴻章咨送國史館有案推之倡
輸鉅款以興闔邑善舉並捐鹽本銀兩加廣永遠學額
遺愛至今繫人思慕茲據該紳士等籲懇於本籍建立

專祠係屬撥案辦理詳請具奏前來臣等查該故鎮陳國瑞轉戰各省迭著奇功山東江蘇立功地方已蒙恩准建立專祠茲湖北本籍亦係該故鎮立功之地所請捐建專祠事同一律合無仰懇天恩俯准撥案將已故記名提督原任浙江處州鎮總兵陳國瑞在於應城縣本籍由紳民捐建專祠列入祀典由地方官春秋致祭以彰勲績而順輿情
硃批另有旨欽此

請將金國琛附祀并請立傳摺

光緒二十年四月三十日

竊據湖北在籍紳士前雲南巡撫賈洪詔等聯名呈稱

已故布政使銜廣東按察使金國琛江蘇江陰縣人自
少讀書敦尙志節留心經世之學咸豐年間以諸生投
効故浙江甯紹台道羅澤南軍營一見卽深加器異委
任營務能與士卒同甘苦而部勒嚴整每督隊勦賊雖
倉猝犯之屹如也咸豐五年隨克江西之弋陽縣廣信
府義甯州湖北之通城崇陽蒲圻咸甯等縣六年隨克
武昌省城及武昌縣黃州府興國州大冶縣暨江西之
瑞昌縣七年故浙江布政使李續賓接統湘軍以該員
謀勇兼優委總理營務處卽分軍襲克江西湖口縣進
克彭澤縣八年四月隨克九江府旋值李續賓三河敗

沒該員與故安徽巡撫李續宜招集散亡激以忠義軍威復振九年逆首石達開圍攻湖南寶慶府餉道文報俱梗李續宜往援該員總理營務處率師先馳赴敵一戰解圍升任湖南巡撫駱秉章奏報敘該員之戰功最詳是役實爲諸軍推服之始故湖北巡撫胡林翼與糧臺書謂該員爲湘軍最久之人得兵心明地勢凡緊要軍謀儕輩中無以過之爰委統撫湘十四營是年冬逆首陳玉成以全股悍黨勾串捻匪十餘萬分道上犯圖解安慶之圍困故提督鮑超軍於小池驛諸軍往救皆失利該員密陳於胡林翼請由間道急行赴援時歲暮

大雪該員率所部十四營自潛山疾趨天堂鎮攀援險阻閱十日乃出高橫嶺仰天菴從萬山深處俯視賊營賊大驚氣奪十年正月十一日大破賊衆燬賊壘七十餘座先後斃賊六千餘人生擒悍酋藍承宣二十六日與諸軍夾擊又大敗之立克太湖潛山兩城是爲該員獨當一面之始十一年二月髮逆大股由皖北上犯楚疆連陷黃州孝感雲夢德安隨州諸城李續宜由桐城赴援賊已繞竄腹地在諸軍之前該員以官軍若由下追勦賊必直趨武漢省垣將危於是請以大軍徑駐武昌身統七千餘人由南岸渡至漢口雙廟楊店一路疾

趨上游與統帶水師彭玉麟爲迎頭截擊之舉連戰皆捷遂克孝感雲夢等城積功洊保道員賞加按察使銜其時逆匪盤踞德安圖窺荆襄該員率所部直搗府城築礮臺掘地道晝夜環攻七月十二日將郡城克復乘勝追至平林市西河暨應山所屬之吳家店等處殲賊萬餘奏上奉旨加布政使銜交軍機處記名簡放是年九月奉旨補授安襄鄖荆道襄樊爲楚邊重鎮髮捻時相窺伺該員於樊城建築土城督率地方文武整頓團防講求戰守迄以無患同治元年七月髮逆馬融和由湖北鄖西縣敗竄河南南陽府糾黨數萬圍攻郡城該

員念南陽與襄樊唇齒相依親率各營越境援勦十六日與賊鏖戰三時之久殲斃悍酋多名賊始敗退次日乘勝追擊四十餘里前後殺賊二千有奇城圍立解民慶更生故大學士湖廣總督官文奏報謂宛郡爲南北關鍵設有疎虞不特秦豫有肘腋之憂卽楚邊亦將不靖厥功甚偉奉旨優敘嗣經前湖北巡撫嚴樹森以赴調遲延奏請以同知降補二年經故大學士兩江總督曾國藩奏調赴皖委統義從等營防戰皖南一帶髮逆迭將豹佛嶺黃備鎮等處之賊勦除殆盡三年十月全皖肅清奉旨開復原官補授甘肅鞏秦階道四年皖南

撤防因母老多病陳請開缺終養八年十二月丁艱十一年三月服闋因籌勸甘餉出力經故大學士陝甘總督左宗棠奏復布政使銜光緒元年十二月奉旨補授廣東督糧道二年五月到任督辦通省釐務釐剔弊端句稽精密四年十月奉旨補授廣東按察使任事後清理積案講求吏治昕夕不遑嗣因勞傷舉發於五年六月十四日在任病故綜計該員先後在軍營十餘年身經百戰迭克名城右臂左腹等處均受有傷年甫五十八未竟其用論者惜之湖北士民稱述戰功感念遺澤厯久不忘由該紳等臚列事實聯名呈懇奏請附祀湖

北省城故巡撫胡林翼專祠並請將戰功事蹟宣付國史館立傳飭由湖北布政使王之春按察使陳寶箴會同善後局司道核明會詳請奏前來臣等查已故臬司金國琛以諸生投効湘軍知名最早轉戰楚江皖豫各省戰功卓越當時統兵大臣如故大學士曾國藩駱秉章左宗棠故巡撫胡林翼等皆深相引重前在湖北攻勦髮逆保衛地方所向克捷不可殫述而其越境解湖南寶慶之圍安撫天堂山之捷解河南南陽之圍皆關繫中原大局稽之奏案采之輿論其勤勞功績實有不可湮沒者近年以來如前浙江按察使劉盛藻兩廣鹽

運使段起安徽鳳潁六泗道任蘭生皆以有功地方一經奏請建祠立傳無不立沛恩施旣據該紳等公呈籲請合無仰懇天恩俯准將已故布政使銜廣東按察使金國琛附祀湖北省城故巡撫胡林翼專祠並請將戰功事蹟宣付國史館立傳以彰盡績而順輿情硃批另有旨欽此

鐵廠著有成效請獎出力各員摺

光緒二十年七月二十四日

竊臣奉旨開辦煉鐵事宜於本年正月業將開爐煅鑛日期奏報並聲明俟續募洋匠到齊卽當接煉鋼鐵等情在案伏查煉鐵一事事理精深端緒繁難工作極爲

艱苦而機勢又極爲危險微特煉鐵煉鋼之匠首各有
專門之學卽審火候司氣門流灰出鐵烘鋼拉軌諸人
周旋於洪爐烈火之間手足稍涉遲鈍卽有轟炸損壞
之虞近來貴州青溪設爐煉鐵南北洋設爐煉鋼堵塞
損傷均所不免鄂省開煉大爐自不得不多用洋匠加
意慎重除原有洋教習鑛師工師各匠不計外續募各
廠洋匠擇其必不可少者招募二十八人係託歐洲著
名之郭格里大鐵廠代雇本年四月始一律到齊以上
年選派出洋學習之華匠二十人副之分派各廠領首
作工先將各爐機器逐件細勘抉其瑕疵參以新法酌

量修改增補務求盡善所增置機具物料工程甚多其
最費工者爲生鐵大爐直至五月初間始行完備當卽
將爐烘乾裝配焦炭鐵鑛灰石諏吉於五月二十五日
升火開煉二十七日出鐵其餘各爐機亦皆演試如法
一切均極順利臣於六月初一日到廠逐一詳勘生鐵
大爐先開一座日夜出鐵八次共五十餘噸近來間有
日出六七十噸者次閱煉熟鐵煉貝色麻鋼輾鐵條製
鋼軌以及錘煉烘壓各法一時並舉其西門士鋼爐因
爐軋破碎購補加修添設爐管目前卽將次完竣接續
開煉次第考驗大抵藉水火風氣之力以神其用其機

力之宏大運動之靈巧火力之猛烈迥非向來土爐人工所能到所出之鐵雖係初煉已與外洋相較無甚軒輊蓋外洋各國講求鍊鐵鍊鋼之法已數百年始能及其精美中國甫經開辦豈敢謂遽造精微然就目前工力物料揆之從此講求不懈將來化學日精工匠日熟似尙不難與之抗衡現將煉出生熟鐵及鋼軌鋼條等件陸續寄至上海華洋各廠比較貨色考訂價值仍隨時教習華匠講求鍊法精益求精現在江夏馬鞍山煤井其煤可作焦炭合煉鐵之用已開橫窿煤巷現擬進鑿三層橫窿外洋大洗煤機及運煤之鐵挂綫路均已

陸續竣工惟洋式焦炭爐數十座因爐輒破碎購補耽延修造未齊本年十月內定可一律告成儘敷生鐵一爐及各廠鍊鋼之用參以湘省白煤油煤即可兩爐齊開此開煉鋼鐵已著成效之實在情形也竊惟開煤煉鐵一事泰西英法德俄各大國無不視爲自強要圖當務之急講求新法角勝爭長官辦則以全力經營商辦則爲多方保護堅持定力務底於成由煉鐵而製器由製器而練兵用能擴充工商諸務雄長歐洲鄂省奉旨設廠煉鐵實爲中國創辦之事光緒十五年十月十六年正月疊經承准海軍衙門電開大冶下手自是正辦

今日之軌他日之械皆本乎此總以將來軍旅之事無一仰給於人爲斷雖不必卽有其效萬不可竟無其志此舉爲強弱轉機旁觀疑信由他當局經營在我各等語開辦之初稟承醇賢親王指示機宜規畫閎遠志意堅定臣不敢不力任其難激勵大小各員務期以必成爲度惟煤鐵兼營用宏費絀眞知灼見者實罕其人於是衆論紛紜吹求疑沮仰賴聖明在上爲之不疑俾臣得從容布置廠工次第告成開煉有效所有在事各員籌思辦法支配機器督工建廠采鑛尋煤跋涉山川絕幽鑿險加以修造鐵山運道煤鑛井工水陸馬頭各工

程多係創法新奇驚駭物聽之事撫輯羣情綏靖謠詠家喻戶曉舌敝唇焦艱險備嘗始終罔懈經歷四年始竟全功實屬異常出力而在事各洋匠監修營造盡力圖維隨時補救亦無不殫竭心力查福建船廠告成在事各員均蒙恩照異常勞績給予優獎而洋員日意格等已先於同治年間渥蒙優獎並給予犒賞鉅款茲查鐵廠規模地段機器均較船廠爲大而煤鐵並舉事體之艱辛端緒之繁重較船政實爲過之合無仰懇天恩俯念鐵廠爲中國創舉奉旨飭辦要務全廠告成開煉著效實資羣策羣力准由臣將在事出力人員援案擇

尤核其出力等差分別照異常尋常勞績奏請給獎以
昭激勸而勵方來出自逾格鴻慈理合恭摺奏陳伏祈
聖鑒

殊批准其擇尤酌保數員毋許冒濫該衙門知道欽此
請添鐵廠開煉用款片

光緒二十年七月二十四日

再湖北鐵廠實兼采鐵煉鋼開煤三大端爲一事而開
煤所費幾與煉鐵相等本難歸入造廠煉廠項下計算
開平煤鑛費至一二百萬始克成功茲查鐵廠自經始
至觀成以迄開煉用款繁鉅所有奏明撥用借用之款
早經用罄雖經奏准以槍礮廠經費勻撥應用不敷仍

多非原估續估之迭有疎漏實緣開鍊以後經費與造廠工程本係另爲一事原奏曾經聲明必須先行籌墊一年且事皆創舉機局變更靡常隨時補救增出用款多出洋匠原議之外實非豫料所能及也所有增出用款除外洋物料火輒等件破碎短數剝運起卸棧租馬頭零星繁費員司匠頭夫役巡勇薪工雜用不計外約舉其重且大者數端一添購機爐工料如增十五噸大汽錘一具增貝色麻大壓氣機一副增造西門士爐底火泥管及造火輒機器增改生鐵大爐東一座爐內輒式令與煤鑛之性相合增生鐵廠鐵瓦廠棚增中西兩

式洗煤機增內地火軚焦炭爐增鋪地鐵板增廠內鐵路增運鑛運煤鐵車增爐上鐵蓋爐外水池水溝及四圍保險門增銅鐵管鐵水箱增化驗煤鐵各種器具藥料以及汽表風表水表皆極精細貴重之件一添募開鍊洋匠原估擬募八人其餘悉雇熟手之華匠百餘人應用茲查開煉首以生鐵大爐爲重中國從未煉過若欲選用華匠非得聰慧而又強壯之人在廠精煉多年難與斯選卽煉鋼各廠亦非得專門名家之洋匠領首作工手法稍不中程度卽致變生意外均屬危險之極現在續募到洋匠二十八人均係萬不可少已較原估

八人多出兩倍有餘本年湖北天氣酷熱爲時又久鐵廠工作極爲艱苦洋匠已中熱病故二人抱病七人內地工匠體弱生疏者更難得力一添補不全機器查各種運到機器物料沿途損壞既多洋廠闕漏亦復不少除簡便零件由漢陽本廠自行修補二千餘件外其重大精緻機器必須由外洋或上海洋廠重複購補或此一種機器不甚靈動則洋匠必另行購一機器以救之或此式之爐試煉焦炭不淨舊法所采之鑛不多則洋匠又思一法以損益之曠日加工致多繁費一近年外洋金鎊價值日長比初定機器時加至過半一往返電

報與各國出使大臣及洋廠商購物料改換機器訪訂
洋匠日積月累亦成鉅款一多用煤斤鐵山煤鑛開采
轉運以及鐵廠起重運料試鑛開井抽水壓氣無在不
需機器卽無日不需煤斤爲數甚鉅又生鐵大爐購用
外洋焦炭試煉兩月費亦不貲以上各款皆爲原估約
計所難周悉加以王三石煤井三處開至數十丈已費
盡人工機器之力煤層忽然脫節中斷外洋辦法必仍
就其處追尋另行開井辦理而重闢一井非鉅款不辦
現在實無此財力若非馬鞍山煤井有成則全恃湘煤
所費更鉅此則事局變遷多費用款均非意料所及者

也前次續估臣督飭局員及洋匠鑛師悉心攷究以爲若能銷貨周轉則此次續估之後不致再有增添之款乃移步換形層折過多加工遂致加料費日因以費工不特非局員所能限定並非洋匠所能豫知多方補救繁費滋多現在撥借各款旣已湊用無餘若行銷挹注必俟兩爐齊開一年後始能流通轉輸尤須鋼鐵各料悉臻精美華洋各廠考驗詳審相信有素方可期流通無滯至暢銷後尤防有洋鐵減價搶售之患此開煉行銷之初必須寬籌經費始不致停爐待款之實在情形也目前鋼鐵旣已煉成正在得手萬不能不急籌接濟

惟部庫支絀未便再行上請上年二月所奏原擬就槍礮廠布局兩局之經費添補應用無如槍礮廠自奏明添設礮彈槍彈礮架三廠計機器運保等費已需銀三十餘萬兩建廠之費尙不在其內本廠用款必須兼顧勢不能全行撥用布局現須籌還山西借款一時尙未能協助值此廠工已竣煉鐵已成之際所欠者僅此目前籌墊之經費若竟因此停工既於大局有關亦覺前功可惜且鎔鍊鋼鐵若竟停歇則製造槍礮何所取資關繫尤非淺鮮臣夙夜焦急再四籌維惟有仍就湖北本省各款力籌勻撥應用擬請於釐金鹽釐兩項下極

力整頓設法騰挪每年勻撥十萬兩濟用總期無礙京
協各餉以兩年爲率其不敷之款仍照奏案於槍礮廠
常年經費項下勻撥濟用統俟兩爐齊開銷流漸廣卽
可自行周轉事關自強要務臣惟當恪遵海軍衙門先
軌後械之電示竭力籌維次第舉辦以竟全功
硃批該衙門速議具奏欽此

張文襄公全集卷三十四終

吉林慶珍校